

vor ydermenlichen und den Herman bezalen sal. Actum feria sexta post Mauricii anno domini MCCCCXXIII^o.

362.

1423 Juli 31

Peter Gerhard verkauft Hans Melzer vier Mark Zins auf Wiederkauf für 120 Gulden Hauptsumme.

fol. 55r Wieszet das vor uns komen synt in unsern siczczenden rath Peter Gerhard und Hansz Melzer, unsere mitburgere, und Gerhard hat bekanth, das er Melczern mit guten willen uff eynen rechten widirkauff vorkauft habe vyr margk geldes jerlicher czinsze, gelegin in dem dorffe czu Rybenstorff, und habe om dy ggeben vor hündirt unde vor czwenzig rynischze guldin, alz denne der haubtbriff darobir clerlichin uzwiesit und noch des briffes vorschribunge, so solde Gerhard Melzeren andere burge ander vorstorbin burgen stad, dy ym briffe namphaftig geschrebin steen gesaczt haben, der Gerhard nicht vormochte und hat sich keyn Melczern darumbे vorkort und globit, das er noch sine erben Melczern, sinen erben und nachkomen in dy czinsze nymer gereden noch gesprechen sullin noch enwollen. Wer ouch, das es qweme, das Gerhard adir sin erbin alzo stadhafftig weren adir werden und dy czinsze eyn teyl adir gar widir kauffen und losen walden, der sal on Melzer, sine erben adir nochkomen nicht wegern, sundern dy zu losene geben noch lute des briffes, den Gerhard Melczern dar obir ggeben hat und dy bezalunge und ablosunge andirz^{a)} nyrgent geschen denne vor eyn siczczenden rathe, daz man danne in der stad buch alzo schr(eiben) sal. Ouch hat Gerhard gewilkeit, das er noch sine erbin an den vir margk geldis mit keynir andern^{b)} wiese keyne vorguldene schulden zu brengen und er wiesin sullen wenne mit eyn siczczendin rathe. Auch so hat Melzer Gerharden vor sich und sine erbin dy fruntschaft und gunst gethan, wenne om Gerhard sin vorgeschr(iebenes) gelt zur gnüge vorgewiszit om adir sinen erben und nachkomen, so sulle und wolle sie Gerharde des geldes eyn gancz jar tag geben und Gerhard sal denne noch sulcher vor gewiszunge sich siner zinsze undirwinden und dy heben, daryn om Melzer, sine erben und nachkomen nymmer geredin noch gesprechen sollen, das sy alzo uff beideteil gekorit haben. Actum sabbato post Jacobi coram proconsule Andrae Wetterhan et sociorum eius anno domini MCCCCXXIII^o.

a) folgt durchgestrichen nur b) folgt durchgestrichen keyne